

Un sueño cu ta birando realidad

Financiamiento di Comunidad Europeo pa proyecto di Museo Arqueologico Aruba

ORANJESTAD - “Un sueño cu ta birando realidad”, asina Museo Arqueologico Aruba (MAA) ta cataloga e financiamiento di nan proyecto door di Comunidad Europeo pa un suma di 4.4 miyon Euro.

Un proyecto cu ta data for di prome cu aña 1990 ora cu sr. Evelino Fingal, e tempo ey director di MAA, a cuminsa traha riba e propuesta pa compra edificionan historico den Schelpstraat for di famia Ecury y converti esakinan den e museo arqueologico mas moderno den nos region. MAA e tempo ey caba tabata sinta cu falta di espacio pa su coleccion y su actividadnan di indole científico, educativo y recreativo.

COMPRA DI E EDIFICIO

Na 1993 a presenta e proyecto na Fondo Europeo pa medio di Departamento di Asuntonan Economico. E representantenan di e Fondo a bay di acuerdo pa financia e proyecto cu excepcion

di compra di e edificio. E motibo principal: MAA ta un departamento di Gobierno y e Fondo no ta cumpra propiedad pa Gobierno. MAA a persevera y na 1997, Gobierno di Aruba a compra e edificionan historico for di famia Ecury. Trabaonan pa logra finaliza e financiamiento a dura añanan y den transcurso di esaki a duna e proyecto e nomber di “National Museum of Aruba”. Sin embargo e esencia a keda practicamente igual, esta crea un espacio adecuado y digno pa warda, cuida y promove Aruba su herencia Indian. Na mes tempo lo restaura y duna un funcion practico na edificionan monumental den centro di Oranjestad. Awe Aruba a haya un suma substancial regalo pa por ehecuta e proyecto.

E proyecto cultural aki ta trece un inversion den economia di Aruba y tambe lo yuda na mehora nos isla como producto turistico. MAA awor lo cuminsa prepara un campaña di informacion pa

publico en general tocante e museo nobo y e cambionan cu MAA lo mester pasa aden prome cu habri e edificionan nobo.

MAA ta desea di gradici y

felicita tur hende y instancia cu durante añanan a duna nan sosten na e proyecto aki. Un pabien special ta bay na Fundacion Parke Nacional Arikok cu tambe a haya fondo

pa proyectonan importante den Parke.

Pabien Aruba cu e regalo aki pa yuda cuida y realiza herencia cultural y natural di nos pais.